

翠

述

清  
歙縣程杏軒著

學

述

安徽人民出版社

## 前言

本省歷代名醫輩出。遠自漢代華陀。宋代張杲。明代汪机。方有執。孫一奎。吳崐。江瓘。朱一麟。近迄清代汪昂。吳謙。程林。程國彭。顧世澄。鄭梅澗等。皆著稱於世。其它專門著作。方論兼備。治效卓著者。不勝枚舉。惟舊社會反動統治階級不予重視。每多湮沒不彰。或遭兵亂亡失。

解放以後。黨與人民政府正確執行中醫政策。繼承與發揚祖國醫學遺產。光輝所照。億民同欣。爰將歷年蒐集所得本省名醫著作。擇其持論不苟。闡述精微。而

坊間又復較罕見者。陸續整理付印。以供中西醫研究參攷之用。

醫述十六卷。系歙縣程文囿撰。文囿字杏軒。號觀泉。清代乾隆嘉慶道光間名醫。歙縣志方技有傳。書名醫述。取述而不作之意。文囿以醫書浩繁。學者苦難遍閱。乃積數十年之力。上自靈樞素問。下至近代名家。采書三百餘種。綜貫衆說。參合心得。分類比附。渾然自成一整體。得此一編。即可省涉獵羣書之勞。而收取精用宏之效。然因歷史條件所限。本書取材仍難免有欠完善之處。邪祟一門。卽摻雜唯心論點之處甚多。但瑕不掩瑜。善學者自能鑑別。



原書初版刊於道光九年〔一八二九年〕後經兵燹版燬。光緒十七年〔一八九一年〕涇縣朱氏重刊於漢口。其版亦不存。是編以二本互校。發現重刊本錯字四百六十八字。誤脫九字。誤愆十四字。顛倒二十處。五卷二十頁與二十一頁倒置。復取素問靈樞等原著對勘。異同亦多。非撰者有意節取。卽所據本與今通行本不同。然無損於學。未便輒改。獨刻誤者。始予改正。計三十字。又原本無句逗。今并加斷句。以便閱讀。遺誤之處。尚希讀者指正。

安徽省衛生廳 一九五九年九月

## 自序

荀卿有言。欲觀聖王之迹。則於其粲然者矣。岐黃之道。至此亦可謂粲然矣乎。考諸靈素難經仲景而後。如河間東垣丹溪以及歷朝先哲。卓然成家者。指不勝屈。其間雖純駁不齊。苟能採其菁華。遺其糟粕。何莫非後事之師乎。余弱冠。卽究心斯道。寢食於茲者數十餘年。每於臨證之暇。取先正之書。反覆披閱。語有精粹。輒隨劄記。歲月旣深。卷帙遂多。紛紜雜沓。因重爲編次。分門別類。列爲十六卷。題曰醫述。吳春麓侍御見而善之。謂醫書汗牛充棟。學者誠難遍閱。是集厚不盈尺。而於古今

諸書。揭要提綱。蒐輯略備。俾學者讀之。可以遵道得路。誠醫林之寶筏也。余自愧謏陋。於先正羣書。未能盡覩。一斑之窺。知不免貽譏於大雅。特以數十年涉獵之心。不欲廢棄。尚望後之君子。補其闕略云爾。

道光六年歲在丙戌季春月上浣古歙程文囿自序

## 序

嘉慶丁卯。余以艱南歸。客遊大梁。使院病甚。時 程君杏軒爲覺生同年治疾。先期至。因爲進刀圭。應手輒效。是年五月。與杏軒別。己巳之秋。予至新安。晤杏軒。輒言將病。又九年。余再來紫陽。杏軒果病。手一編示余曰。予懼夫病者之多。而治病者之誤也。爰輯是編。以備臨證參攷。不意竟自致病也。嗟乎。病人之病而自病。使病常在己。而不病常在人。杏軒之身病。而心固未嘗病也。推是心也。卽以之醫國可也。其書十有六卷。凡一百餘門。其採輯三百餘家。大旨歸於治病於未病之先。與古之



十全爲上之旨有合焉者。讀者自能含咀而決擇之。茲不復贅。爰敘其著書之顛末於此。使人知其用心之所存云。

嘉慶丁丑孟夏春麓吳賡枚拜書於古懷德堂

## 序

醫學之精難於舉業。俗儒日事咕嗶。童年肄習。白首茫然。不過自廢。醫則呼吸存亡之責寄焉。經生不能博覽羣書。枵腹箝口。尚無訾之者。醫或涉獵不多。胸無把握。臨證斷難措手。遑言奏效。此業醫者不可以不精也。鍾少善病。困牀蓐者數矣。置舉業爲緩圖。日親藥裹。因識藥性。繙閱古今醫書。頗得大意。計偕後奔走燕北。體稍強。藥餌亦漸減。而與醫術遂日疏。厥後迷悶簿書。倥偬郵驛。食少暇頃。竟不知藥爲何物矣。年來自清海歸梓。日與故園父老相晤言。每聞患疾家延醫多莫治。心訝

之。爲詢其方。攻補溫涼。漫無定見。皆以病爲嘗試。蓋惟脈證均不明故。余非專家。此中癥結未洞澈。默不敢言。日耿耿於心。思得博雅君子一問津焉。尺咫之區。見聞莫擴。惟自披覽前賢著述。悉力研究。終未能深信於中而無疑。今春家錫三師歸。言巖鎮觀泉程先生爲通儒名醫。心嚮往之。因造謁焉。先生藹度赤誠。一見如舊識。出示所著詩鈔兩卷。醫案三卷。並得讀醫述十六卷。於此益識先生之學。遠紹旁搜。鉤元提要。博而能約。實足發前人之奧窔。爲後學之津梁也。夫醫之爲道大矣哉。體陰陽五行。與周易性理諸書通。辨五方風土。與官禮王制諸書通。察寒熱虛實脈證。嚴於辨獄。立攻

補和解方陣。重於行軍。固難爲淺見寡聞道也。先生  
萃數十年攷訂。遵古述古而未嘗泥古。凡前人所言深  
中肯綮者。一一編次。分門別類。鄭重周詳。禮云。醫不三  
世。不服其藥。三世。三皇之世之書也。先生上溯軒岐。  
下逮漢唐宋明諸家緒論。無不融貫於胸。原原本本。稱  
心而言。非但三世已也。使推此以習舉業。定蚤獨出冠  
時矣。顧愚謂終不如先生仁心仁術。活世壽世之功  
之大且久也。謹序。

道光丁亥歲長至前三日後學朱鍾拜撰



## 序

醫曷爲以述名也。語云。述而不作。蓋醫自素問難經以來。作者略具。無所事於作也。迨金元時。諸家門戶角立。乃各持其言。爭相排擊。於是而欲薈萃羣家。折衷一是。則非作之難而述之難也。述之不備。則美善缺如。不醇。則又瑕瑜互見。觀泉先生婆心濟世。積數十年心力。爲之溯其原流。分其證治。剖其是非得失利病之所以然。而成之。此先生之善於述者也。獨是善於述矣。而唯輯前說不贅一辭。得也。夫後世非無述者。類皆條列件繫。議論紛然。蠡測管窺。出奴入主。亦徒見其辭之費。

而未必有當於作者之旨也。先生則擇焉而精。譬猶金之在鎔也。爲水溢。爲冰釋。爲列星之行。爲芙蓉之始出焉。前者黃帝扁鵲仲景諸大宗。其鑪也。河間東垣丹溪諸名家。其範也。論證論治論方。提宗挈要。綱舉目張。其裝炭也。而采金蕢。汰頑礦。聚精會神。與古人印心原於百世而上。則先生自具之橐籥也。洵乎先生之善於述也。卽謂先生之以述爲作可也。先生故工爲詩。昔司空表聖詩品有云。不著一字。盡得風流。嚴滄浪論詩云。不落言筌者上也。又云。不假一知半解之悟。正先生不贅一辭之謂也。濂不知醫。而竊服膺於是述也。爰附數語於其簡端云。藕莊愚弟朱濂拜撰。

# 序

醫書汗牛充棟。然博而不約。學者無所折衷焉。曩聞新安程杏軒先生著醫述十六卷。上自靈樞素問。下迄

國朝名家。無不分證辨方。集其說而比附之。取先哲之刀圭。爲後人之津逮。雖曰述而不作。功過作者遠甚。兵燹板燬。欲見其原書不可得。嗣訪得徽醫胡丹展家藏有完本。思假刊之。而醫方珍爲枕中秘也。乃浼槐

孫族弟曾承輾轉關說。而書以出。適竹坡弟歙成幼徵

弟歙成瑤圃姪大堦憲屏姪大壙志卿姪大堅少坪姪

大堤研香姪孫普揚。與有同志。遂重付諸手民。而剞劂

之督。槐孫獨任之。讐校之役。采芝族叔鍾秀侍丞

族弟講成及研香姪孫普揚分襄之。復取先生別刻

醫案三卷附於後。以明先生得於心應於手。有成法

必有成效也。而是書乃稱完璧焉。由是流傳益廣。家置

一編。不但讀活人書者。因流溯源有資攷證。卽就療於

人者。亦可因書以知證。因證以辨方。良楷之劑。知所決

擇。然則先生壽世之功。方流衍而未有艾也。九閱月

工竣。書其緣起。并諸簡首。

光緒十有七年歲在辛卯季秋之月涇上雲溪老人朱

欽成敘

## 序

周官醫師掌醫之政令。左氏傳曰。三折肱爲良醫。古人於醫。蓋慎之矣。後世醫者。不能盡讀古人書。卽以療治爲己任。術小驗。輒自以爲廬扁不能過也。及遇疑難症。則茫無所辨。又不甘自謂不能辨。於是取其近似者而擬議焉。嘗試焉。否則。投以不足損益之藥。而塞責焉。嗚呼。以彼其術。而制人死生。呼吸之頃。欲賴以濟。其可得乎。而信之者。顧曰。醫者意也。不在讀古書。讀書而泥古方。適足以殺人。夫古人之以書教人也。固教人以審脈理。辨藥性。已驗之方。特閒存一二。以備採擇。豈教人拘